



四佳集
十

詩

芝人

~ 16
2415
10



和
2415
18-10




四佳詩集卷之三十一

第十九

詩類

賀安教授 瑚 授吏曹正郎



為臺曾識鐵心肝
 謫宦三年事可嘆
 頭上分明天鑑在
 喜看宣召佐天官
 君時遷左坐儒冠
 只愛從容不避艱
 最識朝廷公論在
 教官有幾得清官
 中丞玄己擢鴻樞
 侍御今為諫大夫
 抱屈長憐賢侍史
 如今高步立亨衢
 憲長年來白盡頭
 中間謗議死堪羞
 只是聖恩渾未報
 可休休日未休休

奉寄許都巡察使二首

四佳詩集卷三十一

聖代巡宣重將軍畫策良蚪鬚儀可象猿臂挽應
強白雪明遠左黃雲捲鬣陽臂鷹時出獵過鼓且
傳觴

榆塞天文動文星帶將星揮刀光似雪飛檄疾於
霆北望龍江黑西來鴨水青幕中無一事歌妓莫
聲停

答諫院

尋梧埤竹掖垣深樽酒風流古到今靈譽當年慚
本院一錢不直況千金

吳居士同鄰宅醉歸有作

居士大隱城市邊不出門前三十年樽中有酒深
如淮邀我勸之三百杯痛飲痛飲醉如泥歸來亦

復迷東西滿街兒童雙手拍笑我醉翁頭雪白

立春前一日夜吟

獨坐悲長夜流光苦逼人子前猶是臘雞後卽為
春白髮不饒貴青燈那負貧老妻頻勸酒滿酌見
情真

立春

我於百年內五十九逢春日月雙飛鳥乾坤一病
身青歸盤菜細白潑甕醪醇節物堪驚眼人情喜
得新

題一菴道人所藏山水圖

一庵道人山水癖龍眠盡手三昧法霜縑一幅絕
奇勝楮眼森寒動高興青山鱗鱗羣龍走長江三

面綠如酒遙看傑閣挿層霄天遊一一皆仙曹林
端隱映何處村竹翠欲滴松濤喧野老杖屨復樽
壺豪談促膝掀長鬚桃花春浪漲幾箇漁郎隨意
飛蘭橈拖樓載酒歌鼓舷相忘湖海皆蹄筌我亦
平生巖壑姿道人有約今幾時畫中虎溪在何所
白蓮卜杜復何許香山居士柴桑翁何不著此圖
畫中道人道人更畫無我思不見三笑圖

寄平安道許巡察使

入居廊廟出邊巡將相安危佩一身自笑虛名老

學士頭顱如此髮絲新

送知禮鄭使君

家世廣文舊才名傳至今誰知報檄喜欲慰倚閭

心愛日百年短望雲千里深如君計自得可惜遊
子吟

一庵專上人房醉歸明日吟成數絕錄奉

惠遠前身一庵老淵明高調四佳翁相逢不覺呵
呵笑身在廬山圖畫中

十年來往贊公房杜老詩狂老更狂一局手談柯
已爛更於何處覓仙方

珍重禪家般若湯策勳三昧洗枯腸醉鄉廣大無
窮盡不省人間四大忙

村家醉後

茅屋小於艇松風喧似江五更殘酒醒月色可東
窓

送平昌李郡守

鐵城清白舊青氈
衮衮簪纓又此賢
佐幕曾看能展驥
為州今喜試烹鮮
更逢陶令之官日
猶記劉黃下第年
郡僻政閒書可讀
會看桃李映門前

孝子圖十詠

劉殷天芹

母病沉綿獨叶閭
忽逢神女賜天芹
人間臘雪盈千尺
綠葉青莖逐白雲

董永貸錢

孝誠珍重格皇天
天遣織女償萬錢
一月足縑三百匹
乘雲歸去杳茫然

伯俞泣杖

兒昔逢笞不泣之兒
今垂淚復何為
只緣母力衰猶甚
兒不痛時得不悲

王祥剖冰

蟻林慈母抱沉痾
雪亂天寒可若何
忽此剖冰雙鯉躍
天心報答亦應多

閔損單衣

薄薄蘆衣不禦寒
嚴顏明察御車難
一言誠感千金重
羣弟皆完後母完

劉氏孝姑

旅窓姑病幾經旬
蠶蚨驅蚊極苦辛
剖股和羹表渾細
事如劉孝婦古無人

田真荆樹

同氣連枝是弟兄分財一夕事堪驚
玆重堂前紫荊樹分來憔悴合來榮

曾參孝親

養親惟在悅乎親日向山中為採薪
齧指動心因孝感踰垣投杼更何人

郭巨埋子

白頭親欲堂中養黃口兒從地下埋
忽得千金滿一釜分明天鑑亦昭回

揚香搯虎

何物寧馨一女兒能騎虎背救親危
紛紛人子何顏面不及高堂定省時

李同隣第醉歸有作錄奉

銀燭高烧照畫堂同隣次第勸金觴
自憐白首風情在起舞佳人錦瑟傍
東風楊柳撚金絲小水鱗鱗漲碧池
笑倩蛾眉共醉飲笙歌院落得歸遲

謝玄風吳太守送楮生次韻

憐君五斗鬢雙華南望相思日轉加
寄我剡藤還自愧年來無夢華生花

荅許巡察奉戲

春水澄澄鴨綠江紅旗黑槩碧油幢
莫言丈夫本無淚知有將軍別淚雙

次韻黃

元元元亨昆季見寄

交遊間閉十經年別後音容又渺然
却在凝塵徐

孺榻無由棹雪剡溪船功名當惜青春裡歲月堪
驚白髮前伯仲才賢真軾轍雙飛不日鶴冲天

次韻黃同年

滿城楊柳動黃金節物依依惱客心更待杏花明
月滿與君同醉管絃音

漢江舟中次蔡子休韻送韓山李太守

自笑徐邈已中聖為送李白將遠行江南漢北幾
千里陽關三疊無盡情

舟中與盧子胖李和伯蔡子休柳子馨飲懽

醉歸

送客客已去中流酒幾巡小風帆飽腹細雨水生
鱗盡醉扶頭後相邀挽袖頻歸來天改暮月色馬

頭新

明日又占巡字作長篇奉寄子休子馨

二月東風如酒醇漢江綠漲生玉鱗蘭舟送客流
中流客行未行酌無巡當筵雙妓翡翠裙高歌欲
遏青天雲羨酒十年蘭陵香杯心澱灑凸十分盧
玉川李謫仙高談豪笑能傾筵蔡邕之子柳州孫
風流醞籍如少年座中中聖老徐邈顛狂如舊頭
盡白鯨吞虹吐亦不讓滄溟欲竭蛟龍怕嗚呼樂
極悲奈何自古聚散如搏沙小李別兄泣挽鬚跡
踟不成驪駒歌山蒼蒼水悠悠年年春草生汀洲
人生會合可懽娛莫作遠遊離別愁

小齋閒題

晚節宜閑適優游一小齋風流思五柳功業愧三槐
靜坐盤雙脚虛心外百骸世情曾擺落詩律自安排

春日

漠漠長空雨乍晴滿城花柳近清明午窓睡覺寂
無事細聽糟牀壓酒聲

春思

池館青春半牽愁柳色新何須醒送日頗覺老隨
人病後惟添懶花時不稱貧西鄰浮甕蟻杖屨莫
辭頻

社日

今年又社日第一憶歸田處處巾車動村村賽鼓

傳一犁膏雨後雙燕小風前欲欲遭田父其於世
網牽

題省敏上人詩卷四首

青眸白足面稜稜傾蓋深知善幻能於不二門通
一路自無始後續千燈儒風久慕師支遁佛日深
耽我少陵自笑贈言多好事古人詩愛字多僧
方外論交老漸稀白頭今喜遇高師挑包為贈黃
金橘袖軸求賡白雪詞敢作退之文暢序未成杜
甫贊公詩從今數面折羊脚三笑廬山也不遲
聞師技癢讀南華莊釋於心孰與多蝶翅鵬搏聊
復爾龜毛兔角定如何百年可哂蠅攢紙萬事終
同齷飲河目擊道存吾豈敢胡然邂逅笑呵呵

紺岳山高磨遠天招提一路緬於絃深春榕葉黃
鷓外明月梨花杜宇前欲尋懶子燒紅芋肯許香
山社白蓮我亦前身老蘇晉醉中時復愛逃禪

春仲偶興以待花期

花時今未到預作賞花心倩婦催新釀呼兒理古
琴樽傾盈北海月亦直南金一座皆佳客相酬滿
意謝

春日

金入垂楊玉謝梅小池新水碧於苔春愁春興誰
深淺燕子不來花未開

賀柳大司憲輕三首

聖代堂堂言路開喜君超擢長為臺升平無事封

章少朝罷香烟滿袖迴

憶昔中臺濫再叨曾無少効報清朝跼看今日鳴
陽鳳長愧當年合口椒
壁上高懸御史箴神羊一角畫森森煩君讀我題
名記同列相規古到今

僧雪岑來訪索詩

山僧不浪出何日出山寮酒向花前飲門從月下
敲閑雲輕似葉小雨細於縑軟語兼詩話從來勝
雉膏

賀承文李判校

吉甫

拜兵曹叅知并戲之

廣文清淡水中盪兵部超遷物議僉說與賀賓須
着眼頭邊白玉脚青鞵

小寒食

寒食前一日

今朝小寒食驟雨又顛風池草慵抽碧園桃勒放
紅炊烟稀近市蠟燭出深宮強飲思工部詩成愧
不工杜甫詩有小

寒食

百五風光寒食天今年風雨如去年生憎弱柳不
堪折無賴小桃還可憐悵望松阡負上塚閑過綺
陌皆禁烟沽來冷酒莫辭醉未到清明携被眠

清明

悵悵清明管物華三分春事二分過東君誤學花
權柄二月終旬未放花

畫梅二十韻奉

教製

梅是花中聖無人識性情氣鍾天地秀心與雪冰
貞子半陽初復枝頭卦已生千紅俱閨寂一白故
輕盈玉蕊天機妙金鬚帝鑄成龍根橫偃蹇鶴幹
瘦崢嶸自信全身白從來到骨清恥隨春冷暖喜
與月將迎馨德蘭同調清風竹舊盟影搖蛟背細
香動麝臍縈脉脉踈還淡依依斜復橫高芬清可
挹雅致迥難爭冷艷蜂應怕寒葩蝶自驚人間最
清絕畫裡轉分明髣髴風霜傑露濡雨露榮到頭
存淡泊換骨幾豪英玉色程明道鐵腸宋廣平不
須求面貌默已合神精勝韻疇非慕芳心我自傾
要宜多採實商鼎為調羹

畫梅

梅花馨德如高人鐵石心肝冰雪身天地中間一
清氣玉色獨立無緇塵孤芳不與衆芳競臘前生
意猶津津萬彙無心共寥寂南枝一白傳消息一
陽來復先占春紅者未紅白未白風流定居百花
前風雨雪月搖奇絕此兄風韻絕可憐畫裡一見
還依然輪困老幹如龍鱗繁英滿枝霜雪纏紛紛
蜂蝶獨何事相干非意猶狂顛嗚呼愛梅非獨花
得梅性情知無多氣鍾陽和類君子相對不俗心
無邪平生知音宋廣平紛紛諸子何須評要領結
子三萬斛手調商鼎為和羹

送三陟崔使君

景禮

三首

碧松亭下少年遊潦倒如今各白頭自媿功名踰

蒲長深院初紅躑躅開走馬頻沾姚合酒姚合詩
走馬令傷唇莫厭杜陵杯醉鄉有德誰能頌愧我顛
狂老不才

三月二日

春光欺老病節物惱心腸白愛芹羹細青憐艾餅
香開筵賓欲到沽酒婢先忙明日重三是踏青興
已狂

又用前韻

流光驚鶴髮世路飽羊腸酒可濡頭醉花曾到骨
香未愁三日近長恨百年忙舉世崇名教誰憐阮
籍狂

三用前韻

何時生馬角多日抱龜腸酒有劉伶德衣無仲郢
香人情多冷暖世事亦莽忙可是青春樂花狂復
月狂

四用前韻

自笑冰霜鬢空餘鐵石腸歐蘇難伯仲班馬孰薰
香俯仰乾坤老馳驅歲月忙慙無適俗韻詩酒况
顛狂

五用前韻

生涯兩蝸角世味一蟬腸竹愛多生靜梅憐抵死
香江山容我老日月為誰忙白髮非春事詩懷狂
更狂

六用前韻

自知僧有髮政似蟹無腸坐盡三丁燭閑燒一炷
香流觀鶯燕禪却恠兔烏忙為報母多酌醒狂似
舊狂

七用前韻

依舊葫蘆手從前覓藿腸心遊虛白室跡愧軟紅
香好作安身計何須為口忙前生四明老人笑本
清狂

八用前韻

處世無青眼謀生只冷腸要憑文字老不愛姓名
香可惜百年短如何四大忙愛花兼愛酒知我謫
仙狂

九用前韻

書籤能滿屋茶椀已搜腸風定柳初鞞雨晴花更
香鶯鶯知我老燕燕向誰忙佳節三三近題詩喜
欲狂

十用前韻

人情三別足世事九回腸滿意梨花酒薰心栢子
香少在迷出處晚節半閑忙春服今方試猶存點
也狂

三月三日成均館都會醉歸吟成近體一首

錄示李次公李蕃仲

斯文冠蓋盍朋簪人物才名斗以南上已風光一
年一良辰行樂三月三彈琴韓愈文允健作記義
之筆已酣多謝諸君容老拙不妨沉醉且豪談

蕃仲見和復次韻二首

青春白髮愧盈簪行樂無人我指南寒食流光經
百五踏青佳節屬重三杏花癡絕桃花小草色萋
迷柳色酣欲典朝衫沽美酒一樽相對細論談
曉攬青銅雪滿簪懶尋芳草出城南宜沽美酒斗
千十相對故人杯兩三老去漸知春去速醒時不
識醉時酣功名死後狺獐閣可博生前一笑談

三次蕃仲韻二首

白頭長愧未投簪家在廣津津水南處世自知宜
去七逢人謾說可休三討尊剪薤詩還妙餞菊迎
梅興已酣更有野人情不惡壺樽杖履日清談
謝池春草碧抽簪躑躅遍開山北南長恨百年不

盈百可憐三月重遇三當時詩老眼空冷何處羨
人心政酣五五三三踏青去也應羞殺捫虱談

送順天府使李公之任

昇平人說小中華燕子樓前勝槩加八馬有碑今
在否他時賢政孰君多

賀金中樞之慶之子應箕選入藝文館

早識白眉有鳳毛鑿坡地切選尤高經帷啓沃傳
家事父子同僚愧我曹

四次蕃仲韻二首

讀君佳句整冠簪不覺書窓日已南歇後無能吾
鄭五辛勤有得子孫三詞源灑墨歸元氣筆勢飛
騰倚半酣大瘦如今慙似杜多時索共阿戎談

短髮刀騷不滿簪雄飛無夢更圖南上林曾借烏
枝一高枕誰營兔窟三老去深知世緣淺閑餘且
復春睡酣多君早有箕裘手已信功名只立談

五次蕃仲韻二首

十載奔忙坐珥簪不堪惆悵望江南眼中時序鳥
過一世上人情狙怒三溪柳受風碧初撚野桃得
雨紅政酣自慙白髮非春事且向花前賭笑談
江上青山玳瑁簪紅塵滿面走東南蹉跎於世腸
回九練漉而今臂折三歲月爛柯棋未罷功名炊
黍夢方酣東風鶯地催花雨浮白何時許共談

哭申大司成自編同年

卅三同榜餘幾人今哭申兄倍愴神間閑陪遊叨

戚屬壘樽談笑見情真畢成婚嫁餘何望大抱才
名竟未伸托後一言猶在耳題詩雙淚已霑巾

行幸孝寧大君第賜讌次鄭河東詩韻

雲需霈澤天同大桃李芳園日自長一曲鈞天猶
在耳昇平何處不仙鄉

謝平壤朴監察惠鯉魚

早卜菟裘樂有餘近來消息問何如大同江水今
猶舊千里傳書足鯉魚

洪亞相林亭次姜晉山韻二首

尺五城南一望通孤亭斗起插雲中漢江春漲葡
萄碧華岳雲開菡萏紅隔屋豈無蘇小小當筵亦
有蜜翁翁諸君盡是穿楊手悔不當年苦學弓

斯文勝會屬高人不分踈才接後塵荏苒光陰經
上巳風流行樂又良辰芳園秉燭復長夜曲水流
觴值暮春白首風情空老大杏花踈影醉扶身

六次蕃仲韻二首

人老花枝不可簪看花步履過池南龜曾有術能
藏六鵲自無依謾遠三雨洗江山增媚嬾日烘花
木倚清酣也宜拚却尋春會傾座何人玉麈談
箕斗虛名誤紱簪倚闌多日唱江南可憐碧柳門
垂五悵望黃花徑有三江漲葡萄初綠淨山蒸躑
躑晚紅酣分明記得歸田興野老山僧共軟談

七次蕃仲韻二首

恠底花時雪一簪緩尋芳草出郊南水中散作東

坡百月下分成李白三傳語光陰惜流轉好憑樽
酒博沉酣行行又近清和節次第春光入笑談
白頭渾欲不勝簪老去詩狂杜錦南日復搜腸茶
椀七時能遣興酒杯三花色漸隨春色老醉鄉相
接睡鄉酣倘來軒冕非吾事宜向樽前信口談

題畫鴨

敗荷枯葦一池秋家鷺依然得自由好向庭除時
飲啄何曾枉費稻梁謀

八次蕃仲韻二首

豪傑登庸盛履簪聖朝文教被東南河清更值千
年一岳祝曾聞萬歲三壽域乾坤仁澤遍春臺日
月惠風酣家家飽得昇平樂挑盡燈花萬口談

百年長愧窘袍簪勝日尋芳漢水南佳境也知天
下獨神山不必海中三登樓高興鶴招近泛艇豪
吟龍睡酣如此江山不可負牢籠風月入詩談

九次蕃仲韻二首

老病踈慵忘盥簪小窓危坐日西南神仙可學丹
還九歲月不留海變三秉燭更謀長夜飲看花只
得一春酣年來詩酒偏成癖世事牛毛不用談
悠悠身世未拋簪閱眼光陰鴈北南有道自持心
抱一無人可語口緘三芹塘雨足蛙聲老花塢春
深蝶夢酣世事輸贏皆物理手談知復勝玄談

暮雨卽事

細雨西山暮微風北寺鍾冥冥雲氣合漠漠樹陰

重已矣看花罷翻然待月慵呼兒成小酌聊可慰
愁容

又用前韻

雨暗先催日山深不礙鐘花香連淡淡柳影累重
重得水鳧兒喜含泥燕子慵春雲亦多事黑白為
誰容

近者日復沉醉每讀君詩醒然不知倦也忘
其老拙輒步韻以求斤正此詩韻強已滿二
十首不亦有技癢者乎然莫非縞帶蕪金之
深意也寄蕃仲文三首

韓山衮衮滿朝簪佳士由来出錦南大手曾脩樓
鳳五深源已倒峽流三詩於一斗醺時妙筆到千

軍掃處酣珍重新篇今滿篋如予老拙不容談

蹉跎身世雪渾簪奔走東西與北南不學神仙陶

八八會當歸去選三三頭邊日月雙輪轉夢裡功

名一枕酣明月杏花踈影滿也宜詩酒打闌談

朝叅久懶不巾簪步履尋花小塢南有興徐家酒

中一無心韓老書上三綠沉金鎖少年興黃妳青

奴晚節酣名教由来多樂地風流不必晉清談

尹同隣壕第與李僉樞約東權僉樞至鄭僉

樞忱辛濟用肅吳隱君考才飲酒聯句大醉

而歸

芳園樂事叙天倫桃李花開柳色新也可續成真
率會臺樽杖屨講同隣

北海樽開客滿來高談驚座疾於雷雖無絲竹聯
詩好金谷無詩有罰杯

三月二十日功臣仲翔宴河東府院君鄭麟
趾獻詩命在座功臣皆次韻鄭昌孫以下四
十餘人各有詩

銅臺水滴響丁東魚藻開筵樂未窮羯鼓留春聲
浩蕩龍旗拂日影冲融誓存帶礪山河裡人在乾
坤雨露中萬歲重瞳臨舜殿五絃琴上播薰風

商山君黃公孝源同知中樞金公細僉樞卞
公袍來訪開小酌盡懽且復聯句明日吟成
近體一首錄寄子固金公

子固憐君是可人高軒辱枉更情真日長小院桃

花雨興逐深樽竹葉春錦瑟有聲能起我金釵無
計小留賓狂歌痛飲逢場事一任傷多杜老唇

上洛府院君金公礪挽詞

聖代時逢舜良臣岳降申功名調鼎鼎形象上棋
檮國已資龜筮運胡屬已辰叨盟緣不淺題挽倍
傷神

三月二十八日

謝塘春草碧抽抽新水粼粼生鴨頭滿地落花深
一膝賞春無興送春愁

送春吟

我欲挽春春不留我欲問春春不語九十日春能
幾何堂堂背我向何處珍重遺我雙白髮奪我少缺

月下詠茶蘼

茶蘼開盡雪層層月上三竿色正澄一夜吟懷清
似水愛花猶自由欄凭

題村墅 物體

三月四月江南春花開無數愁殺人翡翠叢深影
細細鴛鴦水淺波粼粼青山幽幽偃蹇意白鳥故
故飛來親我來高卧北窓下五柳處士應前身

贈蔡應教 壽

高麗官制有藝文應教秩雖卑必擇其有
文章重望他日可主文盟者為之其選至
重本朝仍之我外祖陽村權文忠公道德
文章為百世師範嘗經藝文應教終典文

衡止齋文景公躋克承先業文景傳之韓

山李文烈公季甸文烈即陽村之外孫傳

之寧城崔文靖公恒亦陽村之外孫壻也

居正承之繼寧城居正雖不肖亦陽村之

外孫也一家之內八九十年之間由父及

子外孫三人相繼為藝文應教終秉文柄

官躋一品者千古所罕寔由我外祖積善

之慶詩禮之澤也蔡公陽村之弟梅軒公

之外曾孫於陽村再從外曾孫今授藝文

應教他日亦不得辭吾家相傳衣鉢矣况

蔡君之再擢魏科居正皆忝主席私竊喜

幸吟成數絕錄奉云

蔡子聲名斗以南藝文應教帶頭銜不才敢道傳
衣鉢只喜門生青出藍
陽老文章道德尊傳家正印止齋存外孫相繼今
三葉又屬文忠再從孫

送金叅判永堅赴京四首

漢陽四月春已歸落盡羣花無數飛自古別離多
慷慨此時分手更依依
北望燕山路四千蓬萊宮闕五雲邊知君曾誦詩
三百况復觀光屬妙年
行過鴨綠江水明山海關前萬里城奉使由來丈
夫事棄繻元不羨終生
黃金臺下道途平十二樓臺白玉京少日竒遊渾

似夢如今髀肉坐崢嶸

落花嘆寄高同隣二首

高時
喪妾

昨日君家花正好今日君家花政衰只願花開長
不落花開花落知為誰

三月已闌四月回無數花開次第催好向花園高
著眼薔薇雖謝芍藥開

到廣州村舍

田園今始去茅屋傍山開麥送新秋至梅迎小雨
來討尊時政好剪薔薇與方催野老曾相約黃昏上
釣臺

晚到夢村別墅仍宿用前韻

向晚投村店柴門掩不開幾時頻悵望今日獨還

來遠水晴光漱長林暝色催野人情不惡滿眼具
臺

五月初一日

深深院落小晴時細草幽香動碧池新甕試開端
午酒玫瑰花上轉鶯兒

出城西

雨催重午水生溪夾路垂楊蔭小堤薄暮西城馱
醉過野棠開處翠禽啼

小重午

光陰逢夏五土俗事秋千白紵風生袖黃梅雨滿
天樹踈花落後竹老筍生前明日逢佳節蒲杯次
第傳

訪一庵專上人金光城謙光李韓城頃亦至

終日圍碁抵暮乃還

上方閭寂可圍碁相對無言日自遲薄暮欲歸僧
挽袖滿階紅藥雨紛紛

書安上人送行詩卷

上人飛錫指關西萬水千山一草鞋定向樹雲深
處宿杜鵑花老杜鵑啼

重午

老逢重午日節序去沄沄蒲綠浮杯面榴紅妬舞
裙當門憐艾父狎座愛桐君今日江心鏡何人幸
見分

兒子輩皆帶艾詩以為戲

望渠長自浴蘭湯艾已盈腰最可傷
昔歎古風今寂寞青蒲細切泛輕觴

夏日獨坐

雨入方塘水政肥深深院落暑猶微
荷翻有影魚跳出花落無聲燕蹴飛
未可暫時辭酒盞頗宜長日不巾衣
牛毛萬事人間世五十九年念念非

憶村家

野蚕成繭燕生雛餅餌新香酒滿盃
家在江南何日去一天歸興滿尊鱸

卽事

香塵一霎雨初過人靜簾櫳燕影斜
碧玉新抽湘竹筍絳紗方皴石榴花
眼昏已厭蠅頭字肺渴深

思蟹眼茶兩鬢久判霜雪白只將詩酒付生涯

詠牡丹

風流富貴百花尊國色天香到十分
如何箇樣花開大不及區區芥子孫

詠竹

愛此團欒滿一園萬竿如束氣凌雲
人間在尺知多少真直如今見此君

又用前韻寄一菴

小窓微雨坐敲碁有底山僧訪亦遲
一酌無人判獨醉新詩吟罷寫烏絲

送安上人二首

高僧骨相瘦曾見一庵寮面壁久盤脚
遊方今打

包山行猿自引野宿鶴先招繭足方歸去端知後

會遙

又向關西去何山是舊山鵲峯晴隱隱猪浦響潺
潺月照鄉村近雲埋岳寺閑東枝今已偃歸夢頗
相關

詠白紅芍藥

紅問白時白問紅奇姿異態一園中人間初見西
施白海外誰傳利市紅由來富貴花王亞畢竟才
名藥使同見說揚州多羨種若為歸去賣春風註自
事歸林廣記真臘國舟行北風十日可到每嫁娶則
男歸女第最可笑者國人生女至九歲即請僧誦
經作祝法以手拈童子身取其紅點其額其母
亦用點額喚為利市如後村蜂媒詩有疑是纏頭
我室有姿色也云云劉後村蜂媒詩有疑是纏頭

之利市紅

攬鏡

造物於人戲劇為每嗟心與事相違青銅一攬翻
成笑黑盡雙瞳白盡髭

夏日即事

小晴簾幕日暉暉短帽輕衫暑氣微解籜有心因
雨長落花無力受風飛久拚翰墨藏名姓已厭簪
纓惹是非寶鴨香殘初睡覺客曾來少燕頻歸

即事

曾見玫瑰滿意開可堪狼籍點蒼苔小娥睡
無事為拾殘紅緩步迴

答人求書詩軸

小日曾誇筆似椽揮毫亦復走雲烟眼昏不作蠅
頭字誤染鵝溪白繭殘

雨後惜落花

白白紅紅數朶花春歸粒點老人家狂風急雨無
情思一半朝來減却華

送全羅道觀察使金公永濡五首

青錢學士老南宮杖節行觀四道風士向棘園思
賈餗人從棠舍說康公江山百濟封疆裡人物二
南教化中使罷明年歸報政龍顏有喜識重瞳
民俗甄邦異昔時使華風化我曾知馳驅當日雙
龍節慷慨前人八馬碑葵樹雲烟應護惜燕樓風
月已淒悲湖南自是囊中物採採詠咨小雅詩

藩邦節鉞下青真南斗知應避使星金馬行尋箕
準國鐵牛時訪丑川亭堤通碧骨江鱸白山近頭
流洞鶴青信義溪山應遍盡煩君為我著圖經
髀肉書林四十年卧遊長愧遠遊篇自憐野鳥籠
中日只識醢雞甕裡天皂蓋朱轡長節鉞紅樓翠
幕幾山川歷揚中外君能事洗眼黃扉見着鞭
交遊尚喜自童兒今日相看各鬢絲終始也宜明
出處悲懽不必說分離澄清有志君何負悃悞無
華我亦知分陝由来多物議好將勲業策明時

夏日即事

頭戴鬢巾足草鞋手藜徐步小欄西黑雲將雨催
詩過槐影如龍鵲自啼

書牀

晝睡南窓一枕高小風吹雨送松濤年來無夢吾
衰甚不問周公吐握勞

題畫

矮驢扶傘僕携琴落日行穿松徑深定向山陰尋
道士黃庭滿袖換鷺心

詠寶祥花

淺深紅白淡還濃一架層層雨勢重到底愛花誰
似我前身定是蝶和蜂

松風

滿壑松風灑石砧寒聲斷續響秋江上方一夜清
宜耳半在長空半在窓

三月種鬱金至五月不苗開視已腐爛無生

氣感恨有作

擬見秋來翻鳳尾何知今日腐魚腸從此已添臣
鬢白無由得獻御袍黃

夏日登漢江樓

觸熱停驂獨上樓倚欄千里思悠悠日烘襪穢催
行客風借籬篠送去舟芳草不堪崔灑恨斜陽無
奈子昂愁江山如此吾將老薄暮將歸又小留

幽齋即事

榴花簾幕日晴酣客至焚香共手談晚酌一杯聊
復興鶯聲正在柳梢南

送崔佐郎

信漢

出守順安縣令三首

南宮曾妙選北道又專城五斗人稱屈雙符我謂
榮絃歌期俗羨琴鶴任骨清北道惟君識他年有
盛名

縣小斗許大客過雲樣紛無心事邀譽有手能刺
煩地連平壤近山自妙香分十考知應最公廉在
簡勤

迢遞關河路一麾君獨歸北來編戶少西出故人
稀壠麥秋方熟江魚雨更肥上官時政好相送思
依依

移菊寄居昌君慎公

承善

三三小徑初移菊九九良辰可舉杯我欲今朝因
雨種君宜當日抱琴來

送黃海監司李公封兼簡伯氏平安監司李
公坡以病未餞于郊聊寄拙詩情見乎詞也

六首

黃梅時雨未全晴玉節遙遙出禁城未進陽關一
杯酒病窓扶坐若為情

去年平仲手相分今日悠悠又送君零落一門還
往少可堪北樹隔東雲

駒嶺胡然隔兩鄉沮江一葦可容航何時風雨關
西夜共被從容話對林

風月樓前菡萏秋使華文雅更風流逢君若問交
遊事報我書帷白盡頭

曠遠樓高插碧空青娥皓齒玉玲瓏相逢兩使風

流日肯念狂詩嬰鑠翁

四佳詩集卷之三十一

四佳詩集卷之四十四

第二十

詩類

月下彈琴

春温如玉羅幃幙屋角桃花紅錦萼綵窓珠戶捲
繡簾水沉一炷黃金鴨高人早有遺世心整襟坐
撫瑶徽琴清夜沉沉一輪月高山流水無知音

竹林圍棋

東風如醇雨如油萬竹擅爨翠欲流拖花爛熳蒸
紅霞無乃此地為丹丘畸人相對坐圍棋
高書畫遲一局未了柯已爛羸顛劉蹶

桐葉題詩

秋風一葉墮金井花

夜聲鳳凰枝老翻翠影葉大如盤滑如
字蛟龍騰點筆題詩者誰子無乃前身杜少陵

槐陰晝枕

老槐偃蹇如蚪龍綠陰滿地涵清風珠箔錦幕深
復深清晝睡味如粥濃一夢賭得南柯天南柯日
月無中邊枕上片時百年樂不必羽化登神仙

菊逕開樽

金風薦地昨夜霜籬菊盡開無穀香香看一自
佳色紅紅白白間黃黃兩人對酌侑深杯十分漱
灑葡萄醅他年此樂我亦有袖中已草歸去來

燈下看史

一霎涼颼轉晝闌秋堂夜靜零露溽烏牀棊几淨

如洗金繁玉缺焚膏蘭牙籤觸手白於雪歌枕吾
伊聲不輟勸君慇懃讀五車會有燃藜來太乙

梅底尋香

鵬梅開盡爭雪白南枝北枝繁吐萼主人愛梅已
成癖起傍花枝訪消息愛兄本有鐵石心貞白絕
世無知音巡簷索笑復幾回西湖風味傳至今

園中踏雪

行雲點點黑如鴉寒風料峭飛六花君家庭院銀
世界瓊林琪樹相交柯乘興響屐扶短筇玉色獨
立天地中絕勝騎驢孟襄陽忍凍孤吟肩聳峯

送僧還山二首

黃葉滿庭除秋風掃飛去飄飄如落葉師行向何

靈
峯一萬五千崑崙插空碧下山復上山相隨鶴一
隻

題晉州鳳鳴樓額後

逸少妙筆天下稀傳家骨法生五之柳巷善楷冠
海東亦有耳孫麒麟兒虎生三日便窺牛頭角嶄
然非凡儔年今十歲藝老成手跡亦復追箕裘昨
書大字大於斗風雨颯颯一揮手氣雄初驚虎豹
躍勢壯或見龍蛇走雪庵大字傳者少兒乎何處
得此妙秋蛇春蚓何足數家鷄野鶩不須効驥子
鳳雛何代無昂昂政似千里駒渠家有祖上黨老
珍重凝兒掌中珠老我眼孔閱人多如汝神童曾

幾何弱齡書法乃如此他日定應名大家晉山蒼
蒼晉江流雲物繁華鳴鳳樓銀鈎鐵索照華額兒
名與樓垂千秋

送秋

節序推遷似水流送秋今復思悠悠西風捲盡秋
光去何獨留吾兩鬢秋

夢有詩但記一聯云天教黑誌瑞佳兒覺而
誌之足成一絕

夜夢依稀作一詩天教黑誌瑞佳兒覺來猶自分
明記足作新篇備後知

韓贊成

繼禧挽詞

髻鬣相從白髮新中間交道托雷陳聲名山斗昌

黎是家業箕裘柳巷親位望貳公居鼎鼐圖形千
載照麒麟西風灑盡情鍾淚無復人間見玉人

送菊二首

黃菊東籬滿意開幾回清賞繞徘徊北風一夜霜
摧盡送別傷心又一杯
揖送吾家隱逸花情鍾我輩復如何明年重九應
相見何處登高插帽紗

謝晉山餉羨粥

老病年來齒頰衰何能健飯粥便宜今朝忽此承
嘉惠一啜方知可救飢

題諸賢箕城萍水圖

大同江水碧玉流風月樓無浮碧樓朝天石上雲

千秋麒麟窟前鸚鵡洲西都形勝天下無繁華佳
麗逾杭蘇天教諸子此邂逅使星更與文星俱青
春白日開錦筵望之一一皆神仙青蛾皓齒滿三
行鳳笙龍管聲相連風流文彩勝當時鯨吞虹吐
安足辭箇中豈無紫雲者落魄樊川知是誰

送尹壯元還鄉榮親

看君頭插壯元枝又被天恩得意歸好向庭闈開
慶席萊衣交映錦衣輝

龍頭有子捧金卮鶴髮高堂一笑時君寵母恩今
可報爲君長詠賈同詩

三千禮樂字縱橫一日才名動玉京此去鄉人皆
洗眼耳邊長聽壯元聲

畫猫一百四韻 應製作

乾坤妙亭毒物化正茫洋黜族滋繁庶毛蟲詎數
量麒麟來獻異獬豸解呈祥獅澤神誰比雛虞德
已彰犀珍名海嶠象貢入梯航隱霧斑猶蔚負竭
闕莫強熊羆威震懾龜縮力動勦龍馬生從冀天
星上應房權竒愛驤裊倜儻看驪駟掩野多遺種
蹊田幾服箱寢訛時降飲彘可悲傷獫狁才應
熟韓盧技亦良無虞知卽鹿爾牧想來羊風脚馳
千里銅蹄貉一行狙猴空躁詐狐兔自披猖蹶乳
與含齒負陰還抱陽橫生多蠢蠢昧性亦佹佹猫
子知何物狸奴虎亦當各曾著韓上姓本出苗鄉
性質偏跳捷心情喜蹇剛已能工覬伺亦復巧騰

驥活眼珠生暈斑毛繡錯章磨牙兵利戟抽爪劍
生銜倏似飛星過惡於迅電忙飽將食肉頷養得
飼魚腸瞥爾矜趨足信然事扼吭睛猶分子午鼻
可卜炎涼自愛便身卧爲誰洗面妝輕儂深造次
睥睨異尋常相鼠持疑豫欺人善盜賊害苗饑孔
棘食角罪無償穴屋誠難制穿牖未易防容奸先
托社逞黠詐循牆秘跡潛窺甕竄形暗啣筐誰教
居溷廁正爾耗陳倉早避張湯磔曾逃道客穰投
因嫌器忌發必伺機張多欲固常態爲謀胡不臧
黃昏長自恣白晝遠深蔽此輩紛狂擾誰能快伐
我憑渠常鼓勇制彼肆跳梁齧齧張金鉅哈呀聳
鐵槍尖鬚驚碎易悍目走顛僵曩負纒捨突攫挈

旋奪搶孤雛思搏噬弱肉志吞嘗擣穴探還盡傾
巢種欲亡形軀屠異處肝腦血流滂有腐鴟鳶
無骸螻蟻榜曾消蠹國害更絕損民殃謂物莫些
小論功孰頡頏古人斯鄭重祭蜡爲迎將里杜還
相語祈禳曷不履享神誠必格擊鼓響其鏜除害
真能事興農庶有望禮經書著見函雅報豐穰處
處人皆護家家畜不妨烏瞳誠媚嫵黃耳謾徇伴
猶彼驅魚獺頑然靈尾狼紛紜何足數瑣屑竟難
方出入親懷裏從容近座傍醉眠憑絲罽飽睡藉
茵床職自司匡篋才應敵斧斨去貪法吏峻誅暴
武夫洗從此聲名重相傳族譜昌害人咄義府乳
子瑞唐王祐甫文辭麗昌黎著說汪阿誰工戲墨

特此畫縑細吮筆初盤礴凝神入渺茫欲追閭立
本願効顧長康劉郭爲糟粕韋韓等穉穉丹青增
炳煥繪綵轉焜煌恍惚形容是依稀骨骼詳深知
臻要妙細不失毫芒氣勢猶精悍鋒稜尚駿彭雌
雄相顧眄母子互低昂彪或明於錦白曾皎似霜
柔毫凝淡墨軟毳著輕黃狡獪知千狀嬉娛又一
場竦身疑奮趯安尾訝踉蹌見塊應黠颺聞膽
亦恒新圖儘奇絕異景未渠央雲骨千年石霜姿
百尺篁繁陰籠細細靜影覆蒼蒼紅綻花初艷青
嬌葉更芳色偷猩血膩芬送麝臍香蝶使來遽翅
蜂媒對浩倡飛飛雙繚繞故故兩回徨又此蜻蛚
匝翩然上下翔金牋曾賁飾玉軸巧裝橫拭手摩

掌久措眸展翫長幾年歲秘府今日揭華堂似被
豚魚信來同鳥獸踰聖神尊御極端拱儼垂裳恭
儉居無逸憂勤戒不遑嚴寅恒抑畏祗懼豈寧荒
歲木心傳舜銘盤德媿湯御屏粘諫疏經惺集書
囊竒玩皆踈外細娛盡斥攘像形思傳野山水鄙
玄皇所寶非珍異惟幾念聖狂小臣生下土多日
近天光睿德難禪補王休敢對揚矢詩真不佞當
守願毋忘賡載慙臯稷恭陳誓首颺

晉山君夫人挽詞

竹溪舊家閥來配晉山門四德闋儀盛六珈母則
存魚軒繁福履月殿返精魂蘭玉餘芬在移天奈
鼓盆

壬寅十二月初四日生辰有作

今日是生日年光六十三揆兮初以降衰也老何
堪兩眼花曾翳雙鬢雪更糝舉盃聊自慶不覺醉
成酣

立春五殿春帖字

應製自 上命韻

大玉大妃殿

長樂椒圍瑞日長令辰今復值三陽金回御柳初
添色玉拆宮梅細送香和氣綢緼庭上下祥烟繚
繞殿中央聖孫能盡三朝孝母德尊臨享壽康

仁粹王大妃殿

設管灰飛暖始回九重椒掖慶雲開人間又見三
陽泰天上知應萬福來玉暉浮春涵瑞色金幡映

日巧新裁女中今幸逢堯舜壽獻仙桃第一枚

王大妃殿

三陽初動日舒遲五色雲光繞玉墀天地有春方
發育宮闈何福不來宜曹高盛德邦人識任如微
音國史知千歲光膺長樂慶天教壽筭等須彌

大殿

大殿如天仰至明春回萬物更生成榮頌銀勝知
佳節酒斂瑤觴賀大平日抱五雲呈上瑞風消六
雪報新晴體元聖主敦仁化佳氣葱籠藹鳳城

中宮

坤元協德御中闈母範三宮早嗣徽麟趾禎祥方
有慶雞鳴警戒更無違同光馬鄧今初見儷美任

萃古亦稀况值三陽開泰運自天諸福畢呈襍

迎祥詩五首

大王大妃殿

天屆三元節陽回萬象春宮符樞換舊御醞栢呈
新漢殿尊長信周南被至仁椒盤恭獻瑞祝壽効
封人

仁粹王大妃殿

璇極乾坤轉金闈殿閣深初元逢歲首諸福享天
心奠葵呈佳瑞椒花頌德音永膺長樂慶盛事耀
當今

王大妃殿

三元開泰運萬彙已亨通物候東風裏宮闈北極

中雪消鴛尾白日透繡簾紅擬獻南山壽長秋樂未窮

大啟

麟史春正月龍飛十五年重華瞻舜日大德仰堯天盛澤乾坤內深恩雨露邊大平真有象梅柳萬家烟

中宮

元日開閭闔天低北斗斜上樽浮竹葉新頌獻椒花一氣洪鈞轉三春景物嘉千秋御坤極福祿自來加

二十八日觀儼侍宴

金吾今日進儼來黼座天臨玉殿開十隊俳優呈

百技一時宗宰醉千杯春回太液黃金柳臘盡昭陽白雪梅明日三元賀新歲嵩呼動地殷如雷

癸卯元日

又值三元日年今八八年一身猶似舊萬事不如前白雪雙髯上玄花兩眼邊穩斟柏葉酒就醉且陶然

二日用前韻

元日又明日今年如去年功名是身外行樂且樽前柳色東風裏梅花小雪邊避人聊隱几酌酒自欣然

三日用前韻

衰顏非舊日斗酒慶新年身遇升平日心遊太古

前青春來不盡白日照無邊車馬馳相賀踈慵我
不然

哭金執義命中同年

當年同榜卅三人屈指如今四十春三十二人爲
鬼錄惟予獨在暗傷神

題醜丈夫邀飲羨人圖

鷹眼虬髯黑面奴舉觥時復撫雙壺回頭轉矚龐
豪甚笑隔花枝有美姝

題羨人遇醜丈夫圖

何處濃粧黃四娘扇風花氣玉纖香探春小立翻
惆悵不見子都乃見狂

題李藍浦廬墓詩卷用金乖崖韻

六年哀慕侍親廬頭上明明有帝居自古求忠必
求孝人生忠孝外無餘
伯仲當年接玉廬自將詩酒送諸居兒孫滿眼多
於織知是傳家積慶餘
九峯深處構精廬留與高禪水石居丹荔黃蕉香
瓣在平生追遠不求餘

送黃海道權都事景禧三首

早識當朝傑今爲佐幕賓才名誰與敵籌畫正如
神盤錯簿書簡詢咨原隰頻西關凋弊極第一要
安民

朝廷重方面僚佐屬才豪遴選皆公道馳驅敢獨
勞誰知賢主事不是老功曾努力觀風事飛騰會

有遭
陽關一杯酒今復送西歸北雪梅初落東風馬似
飛首陽山窈窕岳嶺路依稀仍憶曾遊處江山似
舊非

送鄭東萊赴京

君昔誦詩三百篇才高專對共推賢文章可置子
長後禮樂已觀吳札前別樣龍香磨鐵硯新番鳳
管掃花殘行行編作西征錄知有珠璣示我傳

送李執義命崇充書狀官赴京

青蓮居士謫仙老風流詩酒天地少今見耳孫玉
堂豪傳家文章五色毛早登瀛洲妙高躅歸院寵
錫金蓮燭當時賢相韓魏公手捧芝匭達帝聰君

為御史隨使節腸如鐵石面霜雪拔劍一笑謔遠
遊何曾刺刺兒女愁回首北極燕山高大明日月
麗雲霄星辰環拱白王京雙龍殿閣五鳳城赭袍
端拱坐明堂衣冠環佩鳴丁當禮樂百年盛當時
滿朝卿相皆臯夔朝鮮使者如白璧價重連城傾
上國觀光亦復利用賓眼高四海空無人誰知九
州外九州亦有人物非凡流舉舉君今上寥廓一
舉千里追黃鵠送君贈之雙錦段歸來遺我青玉
案梅花如雪柳如金春風別離相思心燕市邊頭
酒初潑黃金臺前杏花月

題李參議季基積城別墅三首

傳家李老又歸盤晚節風流自在閑鼎裏還丹仙

訣妙樽前浮白醉鄉寬波光綠接澄波渡嶽色青
連紺嶽山魂夢已迷塵世界十年沙鳥未盟寒退進

揚州西畔積城東家在烟雲杳靄中錦里已歸杜
工部鹿門早隱龐德公中宵閑倚南樓月永日高
眠北牖風作好山林真宰相功名富貴轉頭空
白髮吾今已滿頭十年長愧未歸休廟堂籌畫思
難得丘壑風流憶共遊昨日喜聞南郭信明朝欲
掉剡溪舟青山滿地無錢買肯許東鄰卜築不

春日二首

池水鱗鱗不染泥桃花欲動小樓西東風二月春
將半揚柳烟籠十里堤

草欲芳時花欲開輕陰幕幕護樓臺平生酷愛杜
陵句漸老逢春能幾回

春日巡園卽事

小雨新晴後桃花向舊蹊帶根移果樹疏土起蔬
畦徑掩陶潛柳門編子羨柴園林春事足竹杖更
芒鞋

送上黨韓公奉使朝京三十首

門闕西原擅海東蜚英一代冠群公商家鼎鼐益
梅手漢室山河帶礪功五長黃扉紆紫誥再扶紅
日上青空堂將相勳庸在終始汾陽伯仲中

右東韻

人物山川間氣鍾風雲千載際奇逢金貂已極三

朝寵鐵卷頰頰萬戶封功業何須論衛霍都俞自
可友夔龍泰山北斗人皆仰德邵年高一代宗

右冬韻

雄豪氣槩鼎能扛大度汪汪萬頃江相業魏公傳
第一家風國士繼無雙銀臺曾寵親黃袞玉塞頻
巡建碧幢從古聲名傳簡策卽今嘉靖位殷邦

右江韻

早謁光陵會遇奇每從帷幄備論思深謀秘計知
誰並勁節精忠只自知仕止聖賢明出處行藏邦
國繫安危深源一爲蒼生起偉烈殊勲照鼎彝

右支韻

每被宣招上禁闈爐烟細細惹朝衣身隨日月依

黃道心與星辰拱紫微鷄舌尋常趨御殿龍顏咫尺
近天威世間富貴真難事如子雙全古亦稀

右微韻

已教姓字動堪輿令德仍兼有令譽總說周公勤
吐握曾聞蕭相愛圖書高飛喜見凌霄鶴得意真
同縱壑魚萬里青雲生脚底功名可信笑談餘

右魚韻

聖君興運握瑤圖輔佐忠良德合符出入嘉謀紆
睿想調和元氣幹洪樞龍興炎祚良平榮鳳集虞
韶稷契謨眼見太平真有象春臺處處頌康衢

右虞韻

光霽胸襟氣吐霓旋看平步上雲梯朝中物望尊

黃閣天上恩光降紫泥耆舊老成當代少風流文
雅古人齊尊高戚里心猶小日日偏承雨露低

右齊韻

盛時文物已同儕濟濟謨明又弼諧干羽舞前朝
舜殿茅茨影裏拜堯階魚游玉藻皆天寵鳳浴金
波盡聖涯夙夜在公心匪懈一生忠節道相偕

右佳韻

四教形像畫雲臺相府潭潭接上台當代聲名齊
萬石傳家福慶擬三槐明時自任經邦策公論皆
推濟世才絲絡御厨頻寵錫霈恩知自九天來

右仄韻

天地鍾靈嶽降神丹青更憶老成臣襟懷寬似無

邊海氣象溫於有脚春東晉風流追謝傅西京延
訪笑平津功名亦極允清謹憂國憂民髮似銀

右真韻

鍾鼎當年策大勲更將堯舜致吾君編脩金鏡千
秋錄黼黻玉皇五色雲八表雍熙歸壽域三邊鎮
定掃妖氛百年耆老典刑在青史他時挹盛芬

右文韻

翟篚朱輪耀一門九重恩錫日便蕃高情暫寄東
山袞佳會常開北海樽退食委蛇心自適功名挹
損道猶存狎鷗亭上求閑口却勝溫公獨樂園

右元韻

曾長天官與夏官當時清譽動朝端早聞池上龍

四律詩集卷四
一四
喉舌今見班頭鳳羽翰許國盡教雙鬢白愛君唯
有才心丹朝朝待漏東方曙銀燭焜煌玉佩珊

右寒韻

龍門早歲忝躋攀今日相看各鬢斑環佩共趨青
瑣闥衣冠齊拜紫宸班文章愧我王盧下相業多
君魏丙間頗識此身同出處相期晚節共投閑

右刪韻

才高專對仗忠賢今歲觀光似去年聖詔許朝恩
不次內藏分賜寵無前眼瞻日月雲霄上身在乾
坤雨露邊好達吾王封奏意會看恩誥降中天

右先韻

五雲宮闕麗層霄環拱星辰共北朝百辟盡趨周

典禮九成方奏舜簫韶御爐烟吐龍涎細宮扇風
搖雉尾翹華人刮日朝鮮使韓一荊州累葉貂

右蕭韻

鬱鬱何須此繫匏送君今復出西郊風吹白雪消
梅塢日借黃金樵柳梢遼野傳驂聞語鶴灤河泛
艇起潛蛟想知朝覲明庭日祝壽南山似竹苞

右肴韻

聖朝賢相擅時豪麟角無雙鳳九毛王謝人才輕
管樂杜房事業比蕭曹月卿出自東方顯星使欣
瞻北極高萬國梯航同拜舞日華暉映鬱金袍

右豪韻

燕山北望鬱嵯峨憶昔觀光似夢過日照麒麟輝

玉砌月明鵝鵲挿銀河猩紅染出昭陽樹鴨綠鱗
生太液波白首閉門空髀肉送君又作遠遊歌

右歌韻

三月東風好物華帝城春色十分加千街柳鞦韆
纖雨萬井紅燃燭爛霞閭闔雲開嚴虎豹旌旗日
暖動龍蛇自天有命頒恩賜俯伏彤庭拜寵嘉

右麻韻

日下迢遙指帝鄉聖神端拱坐明堂鴨江渺渺隣
玄菟鶴野漫漫接白狼碣石至今思禹貢長城依
舊吊秦皇幸逢四海爲家日最好遊觀上國光

右陽韻

天上迢迢白玉京山高萬壽聳崢嶸三千殿閣雙

龍闕十二樓臺五鳳城觀樂已曾慙季子棄繻元
不數終生也應宣召虛前席外海藩臣罕世榮

右庚韻

謳歌共協仰前星奉表君今達帝廷陳奏已能誠
懇切俞音終見降丁寧一行十札頒綸誥千載三
韓荷寵靈完事歸來勤賜宴九重仙樂殷雷霆

右青韻

已喜通津早立登名高位極絕驕矜人情共識推
三達睿眷尤深錫百朋鶴髮醜顏增蘊籍星軺玉
節去飛騰皇家盛事難容說掩盡千家半夜燈

右蒸韻

姓名曾寵覆金甌人物東韓第一流才合使乎曾

壯志心專國耳亦奇謀飛翔早已追黃鵠浩蕩終
斯狎白鷗進退古今全者少如君宜向簡編求

右九韻

憑君欲和遠遊吟歷訪其於慷慨心萬古興亡憶
幽薊百許年爭戰想元金閭山翠接燕山渺遼海亡
黃海深回首亦嘆者日出故鄉情思亦難禁

右八韻

帝德如天四海覃頻年優被聖恩涵周賓又貺昭
三晉錫應霑晝接三文物百年曾煥赫鶯花四
月轉清酣如予老病空皮肉鬱鬱窮隙只可慙

右覃韻

高步巖廊已具瞻一身文武况能兼高名自信韓

忠獻憂樂常懷范仲淹使節卽今星北拱皇恩自
古海東漸何時軟脚藕花月錦瑟聲高玉指纖

右益韻

聖朝三五已登咸天地神明格至誠禮樂鋪張追
漢宋山河鞏固敵殺函花明紫陌紅於錦柳拂青
郊碧似衫我昔頻沽燕市酒卧遊今復墮誕饒

右咸韻

春日卽事

小池垂柳碧簾纖風送輕條拂畫簷墻角杏花昨
夜雨滿枝菩蕾已紅黏

種花

移花次第滿園栽更擬明春爛熳開戲蝶遊蜂皆

得意浮英浪藥莫相猜

種蔬

蔬筍由來性所宜謀非肉食復何期種蔬滿地殘
年興我亦從今學圃為

寒食前二日癸卯春

百五近寒食兩三思暖杯暄曾抽草細寒或勒花
開池活魚兒戲蒼邀燕子來家家嚴火令睡鴨冷
殘灰

寒食前一日

南郭雨晴日東風寒食時其於春筵苒不奈病支
離已攬歸田興仍懷上塚思明朝傳蠟燭更憶古
人詩

寒食

冷節今朝是家家食更寒棗饊嘗不得杏酪覓應
難味撥葡萄甕香傳首簪盤良辰不可負小醉折
花看

聞姜晉山下世悼甚有作

昨日見君面今朝聞訃音思之是死別已矣長痛
心一一言存耳浪浪淚滿襟從今一世內無復伯
牙琴

寒食後一日用前韻

日自安排暖風猶料峭寒流光相代易佳節欲酬
難早茗開烹鼎新蔬已飭盤悠悠感時物勲鏡每
頻看

清明

又值清明百六日更傾美酒十千杯
曲闌西畔鉤簾看躑躅半開山雨來

春興

城上春雲濃欲低杏花一院山鳥啼
幽人睡起坐無語小池一夜芳草齊

春宵吟

冬宵苦長長不眠春宵苦短眠不足
天工造物難自全折長補短亦不得
昨夜樽前講清歡清歡不足東方白
安得春宵換作冬夜長花開不盡月不落

題畫十首

青山半入雲翠栢欲參天縈紆石徑回
一道鳴飛泉

泛泛一靈槎黃河接銀河欲得支機石
為向成都誇

峨峨復洋洋彈盡相思心知音天地少
為有緱仙禽

舉手下子逢賭此山中閑爛柯者誰子
歲月非人間

賢哉二君子相對讓黃金黃金可再得
不可改此心

山高在其上水流走其下江南渺何許
長風送輕舸

破此桃花浪駕彼蓮葉舫泛泛流中流無乃太乙
仙以汝濟川手盪槳向何處隔岸問津者相看欲相
語天幕地爲席醉鄉一何寬夜深不知醒白月如銀
盤
圖
揔說江南好景物天下無不得去江南空見江南

映湖樓行送別安東權判官

映湖樓上春似海映湖樓下水如苔去年春去花
盡落今年春到花滿開花山兒童齊拍手竹馬競
迎遨頭來遨頭遨頭來何晚既來歌誦聲如雷邀

頭本有愷悌心遨頭况抱循良才映湖樓上開錦
筵映湖樓下浮畫船幃帷祭戟多似織賓主一一
皆神仙君不見當年玉輦一巡遊八字金書照銀
鈎又不見今古英雄題滿壁珠璧光芒射斗牛我
昔少年快登樓元龍豪氣浩不收一登騁我千里
萬里遊眺之遐矚再登洗我百載十載教鬱之閑
愁如今卧遊空白髮送君去賞樓上月湖外一望
芳草茵湖邊萬株杏花雪

春思

物華生意暖胚胎春信曾傳燕子來小雨清朝酥
樣潤山禽啄盡小桃開

春望

鷓鴣地東風暖律回人間何地不春臺無人得見春
來處只認杏花開處來

探春

春來樂事許誰知興在巡園步彘時說與庭前百
花樹開須早早落須遲

對花吟

昔年花開我年少今年花開我老年老年老對花潛
悲傷花開不可無壺觴我祿盡爲釀酒村我衣盡
爲沽酒財對花酌酒面雙酡對花不飲愁奈何

晝睡

二月饒昏睡更知春晝長踈簾初轉影古鼎已殘
香暫爾憑書几居然到醉鄉客來休剝啄身世我

都忘

二月晦二首

三月將來二月闌三分春事二分殘紛紛墻角杏
花兩坐對黑爐相與閑

清明寒食都過了又近踏青三月三張望家山春
草綠又隨殘夢到江南

戲書錄奉尹鈴原三首

二月將闌三月來紅紅白白花滿開何事空房工
獨坐恨無小妾勸深杯

日長深院燕飛來病後時時笑口開相對細君供
小酌更教兒子遞行杯

園丁挑菜送青來小甕新醪試撥開持贈高軒深

有意也宜自酌自添杯

明日三月初一日上巳也

明朝是三月又近踏青天上巳風光好良辰興趣
顛欲追永和會愧乏右軍賢花柳多情思韶華滿
眼前

初二日弘文館諸君子設筵申校理從進第

以病不赴奉寄一絕

梅花癡少杏花慙又遍踏青三月三欲赴華筵拚
一醉其於衰謝病難堪

三月三日

三三逢令節一一効前人曲水桃花浪深杯竹葉
春詩憐工部妙筆愛古軍真往事皆陳跡多慙老

病身

題永川鄉春勝事集二十首

梅

雪月前頭白玉梅又乘鸞鶴下瑤臺相看索笑兩
清絕天地中間無點埃

竹

蟠根入地蟄龍知壯志凌雲又一奇大節分明無
曲性此心曾與此君期

柳

誰染黃金萬萬條東風吹攪細於縑主人自愛天
然色不必輕盈學女腰

躑躅

詩集

三

無數春山躑躅花風流第一檀繁華梅檀心性
脂面曾向花壇作大家

野樵

昨夜如酥山雨來幽禽啄盡小樵開不須輕薄隨
流水曾向玄都觀裏栽

山杏

滿枝黏綴小紅開已被佳兒羯鼓催說與主人宜
護惜倚雲吾欲日邊栽

杜鵑

何處春山蜀子規一聲啼了一番悲梨花月色明
於晝一片閑情誰得知

布穀

屋頭紅杏錦鳩啼喚得前村雨一犁忽然攬我歸
田興家在廣陵西崦西

喚起

三竿紅日小窓前禁得兒曹聒我眠莫遣山禽催
喚起也疑驚破醉鄉天

鷓鴣

小塘清淺碧鱗鱗多少閑禽養得馴鷓鴣一雙尤
可愛往來相近亦相親

尋花古寺

尋花直到梵王家意在尋僧不獨花苦被高僧勤
挽袖百花深處話煎茶

餞客溪橋

長橋卧水作龍形送客橋頭雙玉瓶一曲陽關各
分散江南無盡長短亭

疊嶂晴雲

疊嶂高尖碧玉簪春雲漠漠乍晴陰會成霖雨蘇
群槁似是無心亦有心

烟村酒旆

東風花柳颺青帘人在瓊樓揭繡簾要把金龜頻
換酒舉杯時復為君添

晴川素月

清宵對月俯長川明鏡誰分上下天身在臺中銀
世界寧知我亦是神仙

半峯殘照

數峯擎出玉芙蓉落日蒸酣涵落紅一望江湖天
不盡樓臺多自有無中

原頭牧豎

細草春深綠更菲牧兒收放犢兒肥日斜牛背平
於艇短笛橫吹穩跨歸

岸上行人

滔滔四海已迷津歧路蒼茫萬丈塵且問行人何
日了東西南北無盡人

隔林聞笛

風流獨上渭南樓春半如秋思轉悠何處玉人捻
鐵笛一聲拈起暮雲愁

月下琵琶

鷓絃鐵撥照銀蟾皓齒青娥玉指纖歌舞畫堂真
樂事可憐司馬泣青衫

卽事

春雲漠漠陰復低細雨廉纖不作泥芳草池塘未
成夢小紅粧上翠禽啼

踏青日應製作

天屆三三節時維是踏青春光方浩蕩物色撚芳
馨脉脉東風細霏霏小雨冥猩紅開爛熳鴨綠漲
清冷嫩線垂金井繁英照玉檉蝶飛深造次燕語
大丁寧如此良辰好由來樂事并風流思晉俗楔
飲想蘭亭勝境應天秘群賢盡地靈流觴如箭惡
曲水訝龍形鯨飲思何渴鸞翔筆不停銀鈎光射

日瓊韻燄騰星往事成陳跡前修有典刑臣生後
百歲運撫屬千齡時遇陽和泰恩承雨露零宣招
朝漢闕賡載忝虞廷柳映琉璃陞花明錦繡屏右
軍書妙絕俗體字矜辨不必追前輩唯思答聖聽
聊歌大平曲盛澤濶滄溟

復拜議政府左贊成

重入黃扉又八年更驚雙鬢雪飄然多慙弘化非
吾分置散投閑合避賢

賀孫判書拜崇政

多子才名斗以南已從殷鼎早調鹽犀腰更比金
腰顯可信功名只笑談

春宵

春宵花月直千金閑倚闌干獨坐吟忽喚小娃彈
錦瑟一聲拈起一春心

對花有吟

百花時節更風流坐對百花笑不休爲折花枝簪
白髮花應羞上老人頭

寄姜承旨子平

貶所二首

龍頭曾見作龍喉惆悵年來又謫遊世事乘除元
有數功名得失不須憂南來空費思親夢北望長
勞戀主愁知子前身韓吏部忠州無奈是潮州
君今莫數蜀途行此去天應玉汝成藥岳尋花曾
雅興金灘泛艇亦風情今朝赤壁遊坡老明日長
沙召賈生好向惠州長飽飯玉堂金馬竟誰爭

三月仲旬春寒大甚有作

春寒陣陣釀春陰生怕梨花冷不禁起攬綿裘成
小酌晚風吹雨更侵尋

因病未赴會闈試席

聖朝賢俊藹如雲自愧多時忝主文衰病未能參
試席今年桃李屬誰門

春旱

枯旱三春麥未胎荒田不理沒蒿萊誰將澤潤乾
坤手鞭起龍公送雨來

夜卧聞暴雨聲喜作

病牀僵卧睡難成忽聽瓦溝暴雨聲誰識老夫偏
有喜耕田欲雨刈祈晴

晉山君挽詞二首

黃甲當年擢大魁堂堂人物蓋時才已教形像圖
凌閣恨不功名到上台金鼎人間丹未熟玉樓天
上記誰催情鍾白髮同年在老淚霑襟不勝哀
早從詞苑共聯芳妙手推君獨擅場筆法玉鍾傳
骨格文章班馬已薰香死生知己非顏面少壯論
交只腎腸惆悵九京那復作不堪沉痛迫悲傷

春日卽事

一渠春碧細生鱗密竹繁花次第新自笑主人無
事在玉壺沽酒酌頻頻

落花歎

東風驚地吹暖回滿城紅白花滿開昨夜風狂雨

復顛落花如雨翻成堆一年春色已闌珊坐對落
花空長歎空長歎可奈何鏡裏倏忽凋朱顏

次韻武靈見寄四首

莫歎崎嶇蜀道行風流豪氣尚崢嶸雄文已見騰
天皎妙句時聞擲地聾人說才名能獨步自知心
跡本雙清羨如曲逆能長屈不日宣招荷聖情
雙髯如雪北風吹大不如前少壯時無意更成鸚
鵡賦有心追和鷓鴣詩去年訪我來窮巷當日逢
君到遠陞老去筌蹄浮世事狂歌痛飲是吾師
珍重斯文揖盛風龍頭聲譽滿天東將身遭遇千
年運披腹精純一箇忠暫向鼇城尋舊隱已從麟
閣紀元功英雄得失尋常事今見蜚騰阿堵中

凌雲豪氣更飄然圖畫凌烟最少年自信心堅堅
似鐵誰知筆大大於椽明時鱗翼能攀附盛代乾
坤已轉旋想得丹墀曾獨對縱橫禮樂字三千

紅桃已謝有感

庭前好箇紅桃樹雨打風敲花正稀却怨東君大
情薄一朝奪我雲錦歸

紅桃已謝黃薔薇盛開有作

惆悵紅桃送爾歸青春恰恰到薔薇黃娘睡起嬌
無力已妬佳人金縷衣

三月二十九日病中有吟

九十日春都是病今年春似去年春雖然辜負際
春興春欲歸時亦愴神

晨興小坐

清晨力疾坐春盡小園中榆莢空階雨薔薇滿架
風雖然添嫩綠可忍損芳紅細酌渾成醉窮愁一
洗空

惜春

白髮悠悠老病身每逢佳節暗傷神落花飛絮渾
無賴添却閑愁為送春

餞春

三月已闌四月臨堂堂春去何處尋青春政是人
間客纔得相逢又別吟

遣懷

病後青銅雪滿簪一庭風雨落花深甕頭已熟茶

蘿酒墻角誰同芍藥吟索寞生涯重悄悄蕭條院
落轉沉沉久拚踈懶乖時用百歲其於慷慨心

謝金直講送蓴菜鮒魚

雨入春溪水政肥蓴絲細滑鮒兒飛忽然攬我江
村興惆悵思歸苦未歸

水州行贈永川貴公子

水州佳麗天下少水州三月春光好百花爛熳東
風前萬株楊柳黃金燭繁華第一雲錦樓畫棟珠
簾入斗牛樓下碧沼生玉鱗樓外青山娥黛浮王
孫風流盖世豪探春勝日來遊遨桃花駿馬飛流
星白玉爲鞍黃金鑣樓上錦宴開瓊樽十千美酒
鬱金薰青蛾皓齒滿座春珠鈿花冠翡翠裙鷓絃

鐵撥聲相催羯鼓百枝喧晴雷美人起舞飄輕裙
翩躚試學飛燕回琉璃鍾琥珀濃玉盤煮鳳仍魚
龍一座傳觴疾於箭酒花入面臙脂紅良辰行樂
當及時鯨吞虹吐安足辭王孫百杯始半酣乘興
又吐瓊琚詞龍香墨鳳管筆睚眼紫石堅似鐵十
幅蠶紙滑於油一掃字字龍蛟躍佳妓重重紅作
圍快覩爭挽王孫衣但願一笑王孫留不願一別
王孫歸人生自古會合難巫山雲雨猶盡歡鴛鴦
帳中春宵短相思無盡淚闌干淚闌干可奈何恨
不生平鐵作肝君不見分司御史杜老狂一語自
詫回三行青樓薄倖難逃名風撥花落猶尋芳又
不見陶穀學士爲時賢江南一夜郵亭眠相思枉

作風光好因緣妄擬別神仙可笑兩儒酸復酸一
生冷氣無由刪那如今時貴公子文彩氣象傾人
寰優游自得溫柔鄉肉爲屏弓仍爲盤莫說水州
人物尤不曾越笑三年留君不見紫霞洞裏別巖
天世間何處無丹丘緱山公子可伯仲紫洞仙人
爲伴儔乘鸞駕鶴逍遙遊上窮三島下九州蟻蝶
人世三千秋

閑中卽事

老病朝參懶安閑晝睡遲鳥啼欹枕後花落掩門
時宦味一鷄肋春愁千繭絲巡園聊復興響屐過
東籬

戲書贈戒仁上人兼示清隱師清隱今長髮

還俗

清隱居士本儒者中年雞髮身已捨入山出山皆
適意於儒於釋無不可上人何以得此詩立意措
辭何詭竒中間隱然排釋氏胸中所存從可知今
聞隱也顛其冠卒變至道夫何難賈島橫渠死已
久此亦可置伯仲間旣歸何不斯受之從此我不
門庭麾由來傳鉢在傳心此道無奈傳吾師師乎
欲學清隱否遲汝反本還源時

因旱蓮沼盡涸悵然有感

小沼塵生長綠苔荷盤五月小於杯若爲學得真
入術鞭起行龍作雨來

卽事

四佳詩集四古
三十一
小雨輕風不動簾博山香炷爲新添小娥睡起渾
無事白紵閑裁作舞衫

村老餉新麥

麥秋時節憶田家歸計蹉跎奈病何野老爲傳新
粒至爛炊滋味更偏多

端午二首

一年時序又端陽細切菖蒲泛酒觴九節何嘗能
却老不曾饒我鬢邊霜

瓜子櫻桃節物新鞦韆高樹影粼粼閉門獨坐幽
亭晚默默無言學艾人

謁光陵二首

風雲遭遇際明時一十四年被聖私當日龍髯攀

不得寢園來謁不勝悲

今日雙陵宅兆親岡頭金粟瑞氤氳白雲渺渺仙
何去不死微臣白髮新

四佳集卷之四十四

